

Nur a alts Möwelstück.

Zuerst muaß i Euch saog, daß i a alti Fra bin, daß ihr dia Gschichta a versteat. Es is ägentli gaor kee Gschichta, nur sou a Betraohtung, wua mi sou überkumma is.

Es dreabt si um en Tisch, sou en richtiga, gloubiga Auszugstisch. Es woar no e Stück vo mein Heiratsguat. Mei jungi Leut höm doas Haus umgebaut, höm mir mei Altatälstüwla eigericht, viel vo mein alta Zeug nausgschmissa un höm gedoacht si wölla mirs racht gemütli maoch. Vor öllen Dinga dar Tisch künnt naum, dar is viel zua groaß. I höi neß gereät, dann i woar a emoal jung un höi maonches annerst gemaocht wie mei Eltera. Aober wie dar Tisch daus en Houf gstanna woar, mei Bua daos Houlzbeil ghoulte hoat un e Trumm noch en annera roakawa hoat, is mers ganz wea wura un i höi möß denk daß dar Tisch ölles mi mir getält hoat, Fräd un Läd. Er woar immer in der Mitt gstanna. Scho wie i als jungi Fra doas erste Mittagassa auf dann Tisch gstellt höi un mei Mo hoat gsoagt: Guat hoasta gekoucht, groad wie mei Mottr. Doas hör i heut no. I wäß a no wie stoulz mei Mo woar wua ar mir doas erste Haushaltungald auf dann Tisch geleigt hoat. Wie i noacher gemerkt höi, daß öbbes Klees unnerwags woar, höi i zu dann werdenda Vatr gsoagt setz di emoal har zu mir i muaß dir öbbes soag un i höis nit vergassa, ar hoat goarneß gereät, ar hoat nur mei Händ gstreichelt wua auf dann Tisch gelacha woara. Wie unner Bua naochert doa woar, un grässer wura is hoat ar sein Ploatz nawa sein Vatr ghoat, daß ar nauf dann Tisch könn geguck, hoat ar e klees Bankla gkriegt. Wie oft hoat ar sei Schalala umgschmissa bis ar richti könn gass hoat, Emoal woar ar arg krank, undoa hoat dar Doktor gsoagt, doa is es Rezept, h'öffentlich hilfts, euer Kind is arg krank. Doa woar i noachert o mein Tisch gsatza, höi mei Händ ~~zomgeleigt~~ zomgeleigt, nauf dann Kruzifix geguckt un höi gebat, o Herrgott half du mein Kind. Un unner Bua is wieder gsund wura, hoat no a poar Gschwisterli gkriecht un mir höm dann Tisch aus möß ziach, daß mir öll Ploatz ghoat höm. Oft muaß i o dara Festli denk, wua mir o dann Tisch gfeiert höm. Dia Kindtaf dia Weiße Sunnti, dia Nomestoag un vor öllen Dinga dia schöne Weihnachta. In dara schlachta Zeita woar joa nit sou viel druff gstanna wie heut zu Toag, aober mir woara zufrieda wenn mir nur gsund un beinanner wora. Wie dar Kriag kumma is un zwä vo unnerer Buwa fort gemößt höm, woar i oft o dann Tisch gsatza un höi Breafe gschriewa un Feldpostpakli gepaockt, Wieviel Gebatli un guati Wunsch i doa mit neigepaock höi, daos wäß nur unner Herrgott.